

Bahan asal dari Arkib
Negara Malaysia

NEGARA KITA TAMBAH MAJU—PM

KUALA LUMPUR, Rabu — Malaysia beransur-ansur menjadi sebuah negara membangun yang termaju, kata Perdana Menteri, Datuk Seri Dr. Mahathir Mohamad.

Katanya, dengan kestabilan politik yang berterusan, Malaysia berharap dapat meningkatkan pertumbuhan ekonominya.

Beliau menegaskan, kestabilan politik hanya akan dapat dikekalkan sekiranya rakyat memahami dan mematuhi dasar-dasar untuk kebajikan mereka, katanya dalam satu temuramah yang disiarkan dalam majalah Reader's Digest.

Datuk Seri Dr. Mahathir bagaimanapun berkata, terdapat golongan yang tidak bersetuju dengan kerajaan dan sekiranya pandangan ekstrim itu dibiarkan berterusan, ia akan menjadi masalah.

Perdana Menteri berkata, ekonomi negara hanya akan maju sekiranya keluaran dan barangan kilang dapat dijual. Barang-barang boleh menentukan turun naik harga.

Katanya, Malaysia mempunyai bilangan penduduk yang kecil dan memerlukan barang-barang keluaran kilangnya untuk dijual ke negara-negara maju. Aliran ke arah mengadakan sekatan import akan menjejaskan perkembangan ekonomi negara.

Dihentikan

Perdana Menteri seterusnya menegaskan, amalan rasuah haruslah dihentikan sebelum menjadi amalan biasa.

"Itulah yang sedang saya lakukan dan rakyat termasuk kakitangan kerajaan bersetuju," katanya.

"Rasuah itu memang berlaku, saya akui, tetapi ia masih di peringkat di

mana ia tidak diterima secara terbuka," tambahnya.

Mengenai perpaduan antara kaum, Datuk Seri Dr. Mahathir berkata, keadaan itu wujud.

"Kita terpaksa menerangkan kepada orang Melayu mengapa kaum Cina berada di sini dan apa sumbangan mereka dan sebaliknya kita terpaksa menerangkan kepada kaum Cina mengapa kita perlu membantu golongan yang tidak berada."

Mengenai tanggapan beliau adalah seorang pembela kaum Melayu, Datuk Seri Dr. Mahathir berkata, "Saya digelar pembela Melayu oleh orang lain. Saya tidak menggelarkan diri saya sebagai pembela Melayu."

"Saya hanya mahukan masyarakat yang seimbang di mana kaum Melayu dan Cina mendapat faedah yang sama atas kekayaan negara," tambahnya.